

दिनांक : 20.05.2026

समय : 18.45 बजे

आकाशवाणी जयपुर-अजमेर  
प्रादेशिक समाचार

- सुप्रीम कोर्ट जाति आधारित जनगणना रा केंद्र रा फैसला ने चुनौती देवण वाळी अर्जी खारिज कीनीं
- प्रधानमंत्री आवास योजना शहरी 2.0 रा तैत राज्य मांय 5 हजार ऊं बत्ता नुवा मकान बणाया जावेलां
- सहकारी मॉडल माथे आधारित देश री पहली भारत टैक्सी सेवा आवता महीना जयपुर मांय ई सरू व्हेलां
- प्रदेश रा घणखर हलकां मांय लू रा हालात-आवता तीन दिन लू रा थपेड़ा लागता रेहवण रा आसारं

000

सुप्रीम कोर्ट जनगणना-2027 रा तैत जातिगत गणना करावण रा केंद्र सरकार रा फैसला ने चुनौती देवण वाळी अर्जी खारिज कर दीनी हैं मुख्य न्यायाधीश न्यायमूर्ति सूर्यकांत री सदरत वाळी पीठ कह्यो के पिछाड़ी तबका री जनता रा भला सारू जतन करण बाबत् सरकार ने वां री तादाद री जाणकारी व्हेवणो ज़रूरी हैं पीठ कह्यो के ओ मुद्दो सरकार रो नीतिगत अधिकार क्षेत्र मांय आवे हैं ई बीचे प्रदेश मांय जनगणना-2027 रा तैत मकानां री लिस्ट बणावण रो काम चाल रह्यो हैं पाली ज़िला रा दूर-दराज हलकां अर ढाणियां मांय प्रगणक घर-घर जा र एच-एल-ओ ऐप रे जरिए जाणकारी भेळी कर रह्या हैं ई डिजिटल सर्वे रा तैत हर मकान री असली लोकेशन दर्ज करी जा रही है अर जनता ऊं तैतीस सवालां रा जवाब लिया जा रह्या हैं प्रशासन जनता ऊं प्रगणकां ने सही अर पूरी जाणकारी मुहैया करावण री अरज कीनी हैं

000

देश रा न्यारा-न्यारा हलकां मांय लारला दिनां रेलगाडियां मांय लाय लागण रा वाक्यां मांय असामाजिक तत्वां रे शामिल व्हेवण री ठा पड़ी हैं आं मांय राजस्थान री ई दो घटनावां शामिल हैं पाली रा अमरपुरा टेशन कने व्ही एक घटना मांय एक अणजाण जणा रे एक डिब्बा मांय कपड़ो बाळबा री कोशिश करण री ठा पड़ी है, ज्यीं कारण वां डिब्बा मांय लाय लाग गयी हीं कोटा मांय राजधानी एक्सप्रेस मांय लागी लाय ई रेल रा गुसलखाना ऊं सरू व्हेवण री शंका हैं रेलवे मुसाफिरां ने सावचेत रहता थकां शंका लायक हरकत री जाणकारी रेलवे रा हेल्पलाइन नंबर 139 माथे संपर्क करण री राय दीनी हैं

000

मुख्यमंत्री भजनलाल शर्मा ग्राम विकास चौपाल रा तैत आज बांसवाड़ा रा चुड़ादा गांव मांय रात्रि चौपाल लगा र गांव वाळां सागे बातचीत करेलां वां रो काल संवारे गांव रो पैदल दौरो कर र लोगां ऊं बातचीत करण रो कार्यक्रम हैं ध्यानजोग है के ग्राम विकास चौपाल रे जरिए मुख्यमंत्री गांव वाळां सागे सीधी बातचीत कर र सरकार कानी ऊं जनता रा भला सारू चलायी जा रही योजनावां रो फायदो मिलण रा बारा मांय जाणकारी हासिल कर रह्या हैं मुख्यमंत्री रो काल डूंगरपुर ज़िला रा चौरासी हलका रा धंभोला गांव मांय ग्राम विकास चौपाल लगावण रो कार्यक्रम हैं

000

पेट्रोलियम कंपनियां रे मुजब प्रदेश मांय पेट्रोल-डीजल अर रसोई गैर रो ज़रूरी स्टॉक मौजूद हैं मुख्य सचिव वी. श्रीनिवास आज तेल कंपनियां रा नुमाइंदां सागे पेट्रोलियम उत्पादां अर एलपीजी री उपलब्धता रा बारा मांय मीटिंग कीनीं कंपनियां रा राज्य स्तर रा समन्वयक मनोज गुप्ता बतायो के सरकारी तेल कम्पनियां प्रदेश मांय पेट्रोल-डीजल अर रसोई गैस री लगातार पूर्ति कर रही हैं श्री गुप्ता जनता ऊं

घबराहट मांय गैर—जरूरी ईंधन भेळो नी करण री अरज कीनीं ईं बीचे प्रदेश ऊं राज्यसभा सदस्य अर भारतीय जनता पार्टी रा प्रदेश अध्यक्ष मदन राठौड़ कह्यो है के दूजा देशां री तुलना मांय भारत मांय हालात बेहतर अर काबू मांय हैं वे जनता ऊं जरूरत रे मुजब तेल री खरीदी करण री अरज कीनीं

.....

000

प्रदेश रा आंगनबाड़ी केन्द्रां मांय अब बच्चां ने उपमा री ठौड़ पौष्टिक न्यूट्री पुलाव खिलायो जावेलां उपमुख्यमंत्री अर महिला अर बाल विकास मंत्री दीया कुमारी आज जयपुर मांय नुवा न्यूट्री पुलाव रो नमूनो चाख्यो वे कह्यो के प्रदेश रा बच्चां सारू ओ पुलाव स्वाद रे मुजब हैं उपमुख्यमंत्री इण ने बेगो ई आंगनबाडियां मांय बच्चां ने दिया जावण वाळा भोजन मांय शामिल करण बाबत् कह्यो दीया कुमारी बच्चां ने नाश्ता मांय ई मुरमुरा री ठौड़ ई समान दर वाळा दूजा बेहतर अर पौष्टिक आहार रो विकल्प तैयार करण रा हुकम ई दीनां

000

प्रधानमंत्री आवास योजना—शहरी 2.0 रा तैत राज्य मांय करीब 5 हजार नुवा मकान बणाया जावेलां ई रा तैत हर पात्र जणा ने खुद रो पक्को मकान बणावण सारू केन्द्र सरकार री ओर ऊं डोढ लाख अर राज्य सरकार री ओर ऊं 1 लाख रूप्या री सब्सिडी दी जावे हैं मुख्य सचिव वी. श्रीनिवास आज जयपुर मांय प्रधानमंत्री आवास योजना शहरी— 2.0 सारू बणायी ज्यी राज्य स्तर री **सैंक्शनिंग और मॉनिटरिंग कमेटी** री मीटिंग मांय अहलकारां ऊं जाणकारी लीनीं ई योजना रा तैत 125 करोड़ 60 लाख रूप्या री सब्सिडी दी जावेलां

000

प्रदेश मांय स्वच्छ सर्वेक्षण रा तैत न्यारी—न्यारी ठौड़ां साफ—सफाई रा खास अभियान चलाया जा रह्या हैं जोधपुर मांय नगर निगम री ओर ऊं खास गेलां अर जनता रे आवण—जावण री ठौड़ां भीतां माथे राजस्थानी संस्कृति अर पर्यावरण ने बचावण रा संदेश ऊं जुड़ी चित्रकारी करी जा रही हैं पाली मांय ई शहर ने रूपाळो बणावण सारू नगर निगम री ओर ऊं सिटीजन फीडबैक अभियान चलायो जा रह्यो हैं निगम रा कमिश्नर नवीन भारद्वाज जनता ऊं क्यू—आर कोड स्कैन कर र फीडबैक देवण री अपील कीनी हैं

000

जयपुर मांय सहकारी मॉडल माथे आधारित भारत टैक्सी सेवा री सरुआत आवता महीना रा पहला सप्ताह मांय करण रो प्रस्ताव हैं सहकारिता राज्य मंत्री गौतम कुमार दक आज जयपुर रा अपेक्स बैंक मांय राख्यी ज्या सारथी संवाद कार्यक्रम मांय आ जाणकारी दीनीं दिल्ली, मुंबई अर लखनऊ पाछे अब जयपुर मांय ई जनता ने किफायती अर सुरक्षित सफर रो सुबीतो मुहैया करावण सारू आ सेवा सरू करी जावेलां श्री दक कह्यो के ई सेवा मांय कोई बाहरी कंपनी मालिक नी व्हेला, जिण ऊं ड्राईवरां ने गैर—सरकारी कम्पनियां री मनमानी ऊं छुट्टी मिलेलां

000

पश्चिम मध्य रेलवे कोटा मंडल रा गंगापुरसिटी, रामगंजमंडी अर गुड़ला टेशनां रे जंक्शन व्हेवण रो ऐलाण कीनो हैं रेलवे रा अहलकारां रे मुजब अब आं टेशनां रा नाम सागे जंक्शन जोड्यो जावेलां ई सारू जरूरी बदलाव रा हुकम जारी कर दिया ज्या हैं

000

प्रदेश मांय पड़ रही जबदरस्त गर्मी बीचे घणखर ठौड़ां दिन री बगत पारो 42 ऊं 46 डिग्री सेल्सियस बीचे, जदके रात री बगत 26 ऊं 31 डिग्री सेल्सियस बीचे दर्ज कर्यो जा रह्यो हैं जनता सागे जिनावरां अर परिन्दां ने ई गर्मी ऊं बचावण सारू न्यारी—न्यारी ठौड़ां पीवण रा पाणी री व्यवस्था करी ज्यी हैं मौसम विभाग आवता दिनां केई ठौड़ां लू बाजण सारू चेतायो हैं ई बीचे लारला चौबीस घंटा मांय श्रीगंगानगर साढे 46 डिग्री सेल्सियस अधिकतम तापमान सागे राज्य मांय सब ऊं गर्म ठौड़ रह्यो बीकानेर मांय रात री बगत सब ऊं बत्तो 31 दशमलव 1 डिग्री सेल्सियस तापमान दर्ज करी ज्यो अलवर, कोटा, चित्तौडगढ़, फलौदी, बीकानेर अर चूरू मांय बत्तो ऊं बत्तो तापमान 44 डिग्री सेल्सियस ने पार कर ग्यो राजधानी जयपुर मांय ई साढे 42 डिग्री सेल्सियस अधिकतम तापमान नापी ज्यो ई बीचे गर्मी ऊं बचाव

सारू प्रशासन री ओर ऊं न्यारी-न्यारी ठौड़ां छाया रा प्रबन्ध करी ज्या है अर सड़कां माथे पाणी रो छिड़काव कर्यो जा रह्यो हैं

.....

ईं बीचे चिकित्सा मंत्री गजेंद्र सिंह खींवसर अस्पतालां मांय लू रा मरीजां रा ईलाज ऊं जुड्या जरूरी इंतजामात करण रा हुकम दीनां

000

भरतपुर ज़िला मांय सेवर रा सरसां अनुसंधान संस्थान री ओर ऊं मेरा गांव मेरा गौरव अभियान रा तैत रणधीरपुर गांव मांय किसान संगोष्ठी राखी ज्यीं इण मांय कृषि वैज्ञानिक किसानां ने खेती-बाड़ी रा बेहतर तरीकां, प्राकृतिक खेती अर मिट्टी रो स्वास्थ्य बेहतर बणावण रा बारा मांय जाणकारी दीनीं खेती-बाड़ी रा जाणकार किसानां ने मिट्टी री ताकत बचा र राखण सारू जैविक खाद, गोबर री खाद अर ढैंचा सरीखी हरी खाद काम लेवण बाबत् कह्यो

000

हनुमानगढ़ ज़िला मांय तलवाड़ा कने भूरानपुरा गांव मांय स्वास्थ्य विभाग नकली दूध बणावण रो कारखानो पकड़्यो हैं मुख्य चिकित्सा अर स्वास्थ्य अधिकारी डॉ. नवनीत शर्मा बतायो के मौका ऊं मोटी तादाद मांय नकली दूध अर अमानक सामग्री नष्ट करायी ज्यीं

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम "मन की बात" मांय 31 मई ने विचार बतावेलां आ ईं कार्यक्रम री 134वीं कड़ी व्हेलां ईं सारू आप ईं मुफ्त नम्बर 1800-11-7800 माथे 29 मई ताईं राय दे सको हों नरेन्द्र मोदी एप अर माय जीओवी ओपन फोरम रे जरिए ईं विचार भेज्या जा सके हैं

000

संस्कृति मंत्रालय वंदे मातरम् फ्रेम्स राष्ट्रीय फिल्म निर्माण प्रतियोगिता सारू प्रविष्टियां जमा करावण री आखिरी तारीख 31 मई ताईं बधा दीनीं हैं आ होड़ फिल्मां बणावण वाळां, रचनाकारां अर जनता ने समकालीन प्रारूपां रे जरिए वंदे मातरम् री भावना ने नुवा सिरा ऊं पेश करण री प्रेरणा देवे हैं होड़ रील्स, एआई-आधारित फिल्मां अर नान्ही फिल्मां री श्रेणियां मांय व्हेलां

000